

PNG namba 142 long Yunaitet Nesens

Long Mande, 13 Oktoba Papua Niugini i kamap namba 142 memba bilong Yunaitet Nesens.

Praim Minista, Mista Michael Somare, em yet i bin kisim ples bilong mipela long dispela namba wan taim. Em tu i bin mekim tok long olgeta memba bilong olgeta kantri i kibung pinis.

Olgeta nesen i vot orait long PNG i kam insait wantaim ol

Mista Somare i bin tokim ol memba olsem: PNG i laik pren long ol kantri i prenim mipela. Sampela kantri tasol mipela i no laikim: em ol kantri i mekim nogut long ol blakskin insait long ol.

PNG i nupela kantri tasol emi laik wok wantaim ol wansolwara; olsem na em i wantingting wantaim Fiji na Nu Silan long tambuim pairap bi-

long ol atom bom long biksolwara Pasifik.

PNG tu i laik kirapim wok bilong baimna salim olkain samting, em wok bisnis na tret.

Mista Somare i bin givim bikpela tenkyu long Australia, long wanem em i bin bringim dispela kantri i kamap long independens. Em i tenkyu tu long komisin bilong ol teritori insait long Yunaitet Ne-

sens, i bin helpim PNG long ting na taitim bun long kisim independens.

Mista Paulias Matane, em i makim PNG long Amerika, em bai makim mipela tu insait long Yunaitet Nesens.

Bipo Mista Somare i bin go long Yunaitet Nesens, em i bungim Foren Minista bilong Amerika, em Mista H. Kissinger.

Bihain em i flai i go long Englan lukim Kwin.

LUKIM INSAIT

Mani em bun	2
Yangpela aidia.....	4
Stori tumbuna.....	5
Dola laik pinis....	6
Kofi stori.....	8
Strongpela dring...10	
Wokim flaua.....	12
Mani bilong rot... 13	
Fantom.....	14
Poto stori.....	16



Sotim brotkas

Dipatmen bilong brotkas long redio i sot long mani na olsem ol i mas sotim taim long redio na tu ol i pinisim 23 waitmanmeri i wok insait long dispela dipatmen.

Bihain long baset dispela hap bilong Infomesen Dipatmen i sot long K120,000 samting. Sapos ol i no inap kisim dispela mani, Mista Sam Piniaw, em hetman bilong ol, i pret bai ol i mas rausim tu sampela lokal wokman na ripota na anaunsa; na tu ol i mas sotim brotkas taim long redio.

Long sampela hap bilong kantri, ol pipel i kirap nogut long harim dispela tok; long wanem ol i hangamap tru long redio long kisim nius na olkain toksave na tu long harim kain kain musik.

* Poto antap i soim DOKTA MARLENE LONG, F.M.M., em i wanpela blakskin Sista bilong Amerika i bosim haus sik bilong Helt Dipatmen long Nuku insait long bus bilong Aitape long Wes Sepik Provins.

Sista em i dokta tru na em i save tumas long helpim ol mama i karim pikinini na tu long katim bodi na rausim ol sua samting i nogut.

Famili bilong Sista i no Katolik; ol i Baptis. Bihain tasol Sista i kamap Katolik na i go winim planti skul long Amerika na i kamap dokta. Long dispela taim em i go long skul, em i wok inap long 40 aua long wik long baim skul bilong em.

Em i bin bosim haus sik long Ghana, Afrika, inap long 3-pela yia.

PAS I KAM LONG EDITA

Sapos yu gat tok, yu raitim sotpela tasol. Sapos yu raitim longpela, bai mipela i sotim. Yu mas raitim nem bilong yu tru long olgeta pas i kam long mipela. Sapos yu no laik mipela i prinim nem bilong yu tru, orait yu raitim wanpela narapela nem bilong yu.

MANI EM I BUN TRU?

Dia Edita.- Mi gat wanpela wari olsem na nau mi laik autim i go long Wantok Nius. Long dispela tingting em i go olsem katekis yu lus long bikpela senis bilong kantri. Ating yu olsem hap diwai i drip drip long wara na i no pas. Dispela tok bokis i go olsem.

Mi sori tumas long wok bilong yu katekis, i bikpela na i no amamasim wok bilong yu. Wok bilong yu katekis i bikpela na i hevi long karim na pe bilong yu-pela i no bikpela long karim na helpim ol famili. Yu save nau em i taim bilong Papua Niugini i sanap long lek bilong em yet, na kamapim ol bisnis na senisim sindaun bilong ol wanwan man yet long strong bilong em yet.

Mani em i bun tru. Olgeta Rilijes memba ol i no rabis man. Nogat tru ya. Ol i gat mani bilong helpim sindaun bilong ol na i kamapim Daiosis bilong ol yet i go het. Wok bilong peris tu i gat mani bambai pris i ronim gut na i gat moa senis long peris bilong em.

Wok bilong peris em Peris pris tasol i go pas na kamap olsem lida bilong dispela peris bilong em i go het.

Tasol peris pris i no wokim ripot bilong ol katekis i go long dai- rekta bilong bosim ol katekis bambai em i ken wokim rot o tingting long pe bilong ol kate-

kis nogat tru ya. Ol i no tingting long apim pe bilong ol katekis nogat tru na i luk olsem ol i putim ol katekis i go long baksait bilong ol. Olsem wanem long naip, tamiok, blanket, mit, rais, suga, na kaunsil takis. Skul takis na ol kain kain moa samting i senis long dispela taim. Husat i baim ol dispela samting? Bisop? Nogat tru ya em katekis yet tasol mas baim ol dispela samting. Tasol i no bikpela pe nogat tru. Em tetin (13) kina long fotnait o sapos nogat twenti sikis kina tasol long wanpela mun em i no inap long baim olgeta dispela samting mi bin toktok pinis ya.

So long wari bilong mi, mi laik askim ol Bisop na ol kaunsil bilong bisop long olgeta daiosis bilong ol long PNG i mas lukluk gut long dispela tingting bilong mi na stretim bambai ol katekis i ken wok wanbel wantaim olgeta dipatmen bilong dispela kantri na helpim dispela kantri i go antap.

So olgeta memba bilong sios inap long helpim tingting bilong mi na stretim sindaun bilong ol katekis?

So em tasol long tingting bilong mi na mi ken amamas sapos yu gat wankain tingting olsem bilong mi. Na tu sapos yu ting dispela tingting bilong mi i rabis, rait, tasol i go long Wantok Nius.

Adam K. Wanguman
C.M. Namblo/Nuku.

KATEKIS BEKIM KATEKIS

Dia Adam Wangumau,

Yes wantok, mipela i lukim pinis pas bilong yu. Na mipela i save yu gat bikpela wari long sindaun bilong ol katekis bilong Papua Niugini. Adam mitupela i stap long graun na kantri bilong mitupela. Yu na mi mitupela i memba bilong katolik sios, mi laik tok, plis yu isi liklik long raitim kain pas olsem, yu daunim nem bilong ol Misinari i kam hia bilong helpim mitupela.

Tru Adam, sampela taim mi save stap long miting na ol narapela taim tu, na mi painimtru, planti ol Bisop, Pris, Sister, i wari moa long ol katekis na ol i no wari tasol nogat, ol i mekim sampela samting pinis bilong helpim ol katekis. I gat nau planti ol peris pris i larim planti ol wok long han bilong ol wantok bilong mitupela na ol mani i kamap long dispela ol wok, em bilong baim katekis na lukautim peris. Na i no dispela tasol, nogat. I gat sampela samting moa, ol i mekim moa samting bilong helpim dispela. Sapos yu no bilip, plis lukluk tasol na painimaut.

Plis Adam, na long manmeri i ritim dispela yupela tingting gut. Kain pas olsem i no stret, mipela i no ken mekim olsem. Yes Adam, na long ol narapela wantok. Bilong wanem i gat katekis long dispela kantri? Bilong helpim ol pipel. I no bilong kisim mani. Tru, mipela i save kisim liklik presen, wankain olsem ol pipel i save kisim

long taim ol i salim kopra, kopi, kakao, na ol narapela i kamap long hatwok bilong ol. Bikos mipela i laik stap wankain olsem ol pipel. Mipela i no laik antap long ol.

Na wanem kain man i save kamap katekis? Ol man i wari long ol pipel i gat bilip, bel isi man, na daunpasin man. Dispela kain man i save kamap katekis bilong bringim tok bilong gutnius bilong Jisas Kraisis i go long ol pipel. Taim Sios bilong Papua Niugini i kamap gut, na i hangamap stret long han bilong ol memba bilong em, long dispela taim bai ol wokman bilong sios tu bai i sindaun na amamas wantaim ol memba bilong sios.

Adam yu tok, yumi mas kamapim moa bisnis na bai mani i senisim tru sindaun bilong wanwan man. Yu kolim tu, peris em i wanpela bisnis. Na yu tingting peris pris em tasol i bos bilong dispela bisnis. Sori, peris em yumi yet, ol memba bilong dispela peris. Na yu tok tu mani i senisim sindaun bilong ol wanwan man, em i stret, tasol ol pipel long ol ples kanka i no yet, na mipela i laik stap wantaim ol, na wankain olsem ol.

Na yu tu yu gat duti long lukautim wok bilong peris, olsem lukautim katekis, wokim skul, wokim klinik, na ol narapela samting bilong mekim sios bilong mipela long dispela peris i kamap gut. Sori, ating peris i no wanpela kampani bai i bihainim tok bilong leba dipatmen.

I gat wanpela samting moa i go olsem. Adam i tok kisim bikpela mani,

ai i helpim sindaun bilong ol katekis, na mekim kantri i gohet. Mispela i no tru. Kirapim moa bisnis em tasol mekim kantri i gohet, a i helpim sindaun bilong olgeta manmeri.

Nau yet gavman i no kirap long pinisim sampela wok bikos mani i no inap. Na tu sampela lipatmen i wok long rausim ol wokman bikos no gat inap mani bilong baim ol. Planti manmeri i askim long wok, ol bos bilong wok tok no gat wok. I gat wok tasol ol i tingting long mani bilong baim ol.

Na Adam, sapos mipela ol pipel bilong dispela kantri, i wari long kantri bilong mipela i mas kamap gut, na gohet, prait, mipela ol wokman wokmeri bilong dispela kantri i no ken kisim bikpela hap bilong ol mani i kam long narapela kantri. Larim bikpela hap mani i stap long kantri yet, na bai gavman i yusim dispela ol nani bilong mekim moa wok olsem, kirapim ol skul, etpos, rot bris, mekim ol taun mobeta, kirapim ol bisnis, baim ol marasin, bensin, fiul na ol narapela samting bilong gohetim Papua Niugini. Tenkyu.

Munel Wagewa,
Tangugo/Wewak.

HELPIM TARANGU HIA

Dia Edita.-Mi Andorus yes mi wanpela aipas ni askim yupela olgeta kantri. Olsem wanem ai bilong mi bagarap long yia 1970. Yes wantok mi sindaun olsem bai husat i ken mekim wok bilong ni, na helpim ol pipel bilong mi.

Wantok mi wanpela tarangu man na toktok bilong mi inap i go long nasin bilong raitim wantok Nius o narapela

hap tu long kantri na olgeta famili. Yes mi i stap olsem bai husat i ken helpim mi long kai-kai na mani.

Nau mi tarangu tru na yupela olgeta yuropien harim taim bilong mi i laik go bai mi go olsem wanem bai mi ken baim sip o balus tu o nogat? Em tasol liklik stori nius bilong mi.

Mi bilong Wasara Patrol Pos I.S.P. Nau mi stap long Hoskins setlemen. Yes wantok inap bai yupela i bekim pas bilong mi kam bek long, Adres bilong mi olsem: Mista G. Andonus, D.A.S.F. Sarakolok KIMBE?W.N.B.D.

YU MAUSWARA YU LUS

Dia Edita.- Long Sander long 20 de long mun Julai mi ritim leta bilong C. Kandamain bilong Wabag Enga distrik (26-5-75).

Yes wantok, mi man bilong Bougainville na mi laik tokim yu klia olsem, traime na tingting pastaim yu raitim o tokim samting i kamap long Bougainville o samting Bougainville i laikim.

Mi sori tumas long yu wantok, sapos yu laik traime olsem yu tok. Pinisim laik nogut i mekim yu sik. Mi tokim yu stret, mipela ol man bilong Bougainville i no toktok long bruk long mekim yupela wari olsem yu tok. Sapos yu man tru i gat bun, yu go long gavman bilong Michael Somare na tokim em long larim Bougainville i go em yet. Sapos nogat, toktok bilong yu i mauswara tasol. I no gat as bilong en.

Yu bin toktok long mani tu, na mi laik tok klia long yu, ol man bilong Bougainville i no olsem yu sindaun long as; ol i save klos-

tu hap long Fainens bilong PNG. i kam long Bougainville. Na olsem nau yu save. Mipela givim planti na kisim bek inap.

Nau mi laik tok save long yu olsem traime na stap isi na larim mipela i toktok long samting bilong Bougainville na yu no toktok long samting i kamap long Enga Provins wanpela pipel bilong yu. Em tasol.

Peter Chanael Potabu,
Pnaguna/Bougainville.

PASIM MAUS

Dia Edita.- Nau mi gat bikpela wari tru long dispela. Mi save lukim ol man na meri i save tokaut long trabel bilong narapela man o

meri. Mi yet ol i bin tokaut long trabel bilong mi tri taim pinis. Olsem mi gat dispela wari na mi rait long yu edita.

Mi ting em i no stret tru long tokaut long trabel bilong narapela manmeri. Em i no samting bilong yu. Na yu ken tokaut i no laik bilong yu. Em laik bilong wan wan. Sapos em i ting rait o rong em laik bilong em. Sapos plis o papamama i lukim yes laik bilong ol yet tasol yu narapela yu no ken tokaut. Sapos yu husat i bin tokaut pinis bai, yu mas pinis nau. Yu mas tingting. Nogut yu mekim wankain trabel bai dispela man o meri i painim yu Abel Sumbu W. Timbunke/Sepik.

TU MINIT TINGTING

GUTPELA DIWAI, GUTPELA KAIKAI

"Ol man i save lukim kaikai bilong diwai pastaim na ol i ken save em i gutpela diwai o nogat." (Luk 6:44)

I tru. Long kaikai bilong em yumi ken save sapos mango o kokonas o popo i gutpela tri o nogat. Long banana na karuga tu i wankain.

Na wanem samting i mekim em i karim gut? Graun i givim kaikai long en. Em tasol. Gutpela graun, graun i gat gris, em i win. I olsem gutpela samting i hait insait long graun i wok i kam antap na i karim dispela kaikai yu ken lukim. Strong bilong graun yu no ken lukim. Yu ken lukim wok bilong em tasol: kaikai i kamap long tri. Nau yu save.

Yumi wankain. Na Jisas i skruim dispela tingting i go long dispela ples bilong Luk. Em i tok olsem: "Bilong wanem yupela i save koliqi mi 'Bikpela, Bikpela', na yupela i no bihainim tok bilong mi?"

Em i min: Toktok nating i no soim yu gutpela man. Pasin bilong yu long bihainim tok bilong God - em i soim yu gutpela man.

Switpela tok, klewa tok, na planti promis bilong ol man bilong politik na lida na kago profet - em i mauswara nating. Em i no save karim kaikai.

Kisim skul long Jisas: gutpela diwai i karim gutpela kaikai. Gutpela man i karim gutpela kaikai. Lukim wok bilong em na yu ken skelim em yet. Yu traime.

Smatpela yangpela pipel gat aidia

Long Wewak ol i gat wampela gutpela komiti tru bilong tingim olkain we bilong stretim kain kain pasin na trabel. Em ol i kolim Is Sepik Yut Edvai-seri Komiti. Ol i no bikpela man o maritmanmeri. Nogat. Ol i yangpela pipel i maus bilong 23 skul.

Long 15 Oktoba, 27 dispela kain mausman i bung long St. Francis Y.C. Senta na ol i paitim tok long olkain wari i kamap long strongpela dring.

Ol i bin votim 6-pela resolusen. Em hia:

- (1) I tambu long salim strongpela dring long ol tretstua; long hotel na haus dring tasol, orait.
- (2) Hetman bilong stua o hotel i mas lukaut bai no gat yangpela pipel i dring. Sapos em i lukim sampela, em i mas kotim ol. Sapos nogat, ol man i ken kotim em; na em i ken lusim laisens.
- (3) Ol sumatin i dring, ol i mas raus long skul. Sapos nogat, ol i mas baim bikpela kot moa.
- (4) Manmeri i winim 20 yia pinis, i mas kisim wampela laisens long dring long plis, hetkota.
- (5) Ol aua bilong baim dring i mas sotpela moa.
- (6) No larim bai man long ples i ken kisim isi tumas laisens bilong salim dring long tretstua.

Taim ol yangpela pipel ya i paitim tok, sampela man bilong plis na bilong sosal welfe na tisa na ripota na sampela skul liva tu i stap.

Siaman i ranim miting, em Mista N. Aporo; na Mista M. Maingu i helpim em. Kuskus na seketeri em Mista B. Wone bilong Sosal Welfe.

Long ol kain miting olsem, ol yangpela pipel ya i no pret long autim tingting bilong ol. Nogat tru. Sampela i gat kliapela aidia tru.

KEREVAT WINIM K1500

Long 27 Septemba i gat wampela so long Keravat Sinia Haikul klostu long Rabaul. Ol i bin wokim wampela haus o rum bilong putim olkain kaving na penting na samting bilong tumbuna. Ol i kolim dispela ples Tenawawaki - na long tok ples Kuanua em i min: man i save wokim o sapim pes long diwai samting.

Ol sumatin i bin salim olkain samting na ol i bin winim K1500. Ol tisa na studen i amamas tru.

AIR NIUGINI BOS

Mista Bartolomy Philemon bilong Lae em i bin kisim wok bilong Seketeri bilong Komisn bilong bosim ol balus long PNG. Na em tu i helpman bilong namba wan bosman.

Bipo Mista Philemon i bosim ples balus bilong Mt. Hagen.

Em i bilong misin skul long Lae; i bin skul moa long Australia na 3-pela yia olgeta long Yunivesiti bilong PNG. Em i stat long bosim ol tiket bilong olgeta studen i go i kam.


Bihain em i wok wantaim TAL long Melbourne


NAMALIU KISIM PRAIS

Mista Rabbie Namaliu, bipo em i seketeri bilong Michael Somare, na nau em i nupela Provinsal Komisina bilong Is Nu Briten, em i kisim prais long joinim wampela spesel kos long Yunivesiti bilong Kalifornia long Amerika.


Em i bin flai wantaim Michael Somare taim er i go long Yunaitet Nensens.

Mista Namaliu em bilong Raluana Viles klostu long Rabaul. Er i gat 27 yia na i skul pinis long Yunivesiti.


 **YAMAHA**




DT100B




RS100




GT80B



ELA
MOTORS LIMITED



*Burns
Philp*
GROUP OF COMPANIES

 **YAMAHA**

Bipo tru i no gat man ong Enga Distrik. Tasol ong Laiagam sab distrik (Enga) i gat wanpela tarangau (Kamp) i tap.

Em i gat wanpela bikpela pik mama bilong em tret. Tarangau (Kamp)

save slip long hul ilong wanpela bikpela iwai. Pik mama bilong arangau i save slip lostu long as bilong ispela bikpela diwai.

Wanpela taim pik mama ilong tarangau i lus a tarangau i wok long ainim pik hia i go nap 3-pela de olgeta. a em i painim pik bilong em i go klostu na m i harim sampela liklik pik i kraik insait ong bus.

Na em i lukim wanpela bikpela ston. Aninit ong ston em i lukim bikpela pik mama bilong em i slip na wok long givim susulong ol pikinini pik.

Tarangau i go klostu tru na sanap kaunim ol pikinini pik na em i lukim wanpela pikinini man tu i dring susu wantaim o liklik pik. Na tarangau i amamas tru na i kisim pikinini man hia i go aninit long ving bilong em.

Na em i pasim pik mama long rop na ol liklik pik em i pulimapim long bilum bilong em na bringim ol i go long haus bilong em. Tarangau ya i pasim pik mama long as bilong bikpela diwai na ol liklik pik em i larim wantaim mama. Na em i karim pikinini man i go antap long hul bilong diwai, tarangau i save slip long en. Em i putim pikinini insait long hul bilong diwai na em i kilim wan wan pikinini pik na givim long pikinini man.

Na tarangau yet i kilim kain kain kapul tu na givim mit bilong

kapul long pikinini long kaikai. Na pikinini man hia i gro i go bikpela boi pinis. Klostu em i winim 12 o 13 yia pinis. Nau tarangau i holim boi hia long 2-pela han bilong em na bringim em i go daun long graun. Tarangau i givim nem Tanjen long em na wok long soim em we na pasin tru bilong wokim haus, gaden, banara, na bilas olkain samting bilong lukautim pik tu long em.

Na klostu olsem Tanjen i winim 20 o 21 yia olsem pinis na em i gat planti pik na gaden tru. Em i save slip long haus man bilong em. Olgeta moning long 4 o 5 klok em i save slip long bet bilong em na i save pilaim susap bilong em.

Long wanpela nait em i slip long haus man bilong em. Tarangau i go long sampela hap long nait tru na i opim dua long wanpela haus meri na em i lukim wanpela naispela yangpela meri i slip i stap long bet bilong em. Tarangau i putim 2-pela han bi-

long em i go aninit long bet bilong yangpela meri ya i slip long en na karim meri i go na putim insait long haus bilong Tanjen na em i pasim dua na i go pinis.

Tanjen i no harim o pilim nois tu em i slip pinis. Meri tu em i no lukim o harim tu Tarangau. Em i slip tru.

Klostu tulait na Tanjen i kisim susap bilong em na em i kirap pilaim. Yangpela meri em i kirap na tok, klostu tulait na mi laik slip, yu wanem longlong man i kam long haus bilong mi na paitim susap olsem.

Tanjen i kirap nogut na guria tru na em i pret. Em i no save em husat i kam slip long haus bilong em na wok long krosim em.


Bihain Tanjen i kirap na askim em: Yu husat? Yu kam olsem wanem na kam slip long haus bilong mi na yu krosim mi olsem? Em i no haus bilong yu. Nau tupela i pait long toktok i go i go inap tulait. Tanjen i tok: yu kirap i go

ausait. Na naispela yangpela meri hia i go ausait na lukluk. Tru, em i no haus o ples bilong em. Olsem na em i pret tru na sindaun klostu long arere bilong haus. Na Tanjen i tok bai mi kilim wanpela pik na givim yu bai yu ken karim i go long ples bilong yu.




Nau tru Tanjen i redim kumu samting pinis na kilim wanpela bikpela pik na mumuim pinis em i givim long yangpela meri na tokim em, yu karim i go. Meri hia i karim pik i go.

Tasol i no gat rot tru. Bikpela ston i banisim em pinis na i no gat rot long go long ples bilong em olsem na em i kam bek long haus bilong Tanjen gen.

Olgeta de Tanjen i kilim pik na tokim meri long karim i go long ples bilong em, tasol ston i pasim rot na em i kam bek. Bihain Tanjen i maritim dispela yangpela meri na tupela i karim planti pikinini moa olsem na man i kam- (lukim moa long pes 10)



TOKSAVE KAM LONG PNG BENG




LONG MANI BILONG AUSTRALIA


Bilong wanem mani bilong
Australia i laik pinis nau?




Olsem yumi mas gat
mani bilong yumi stret.





Yumi no moa hap
bilong Australia tasol



Yu ken senisim mani bilong
Australia i go long Kina na
toa long beng' klastu long yu





KOPI

PNG i mas mekim kamapim gutpela kopi tru long dispela taim. Sapos yumi laik winim tingting na laik bilong ol narapela kantri long kopi bilong yumi.

Planti narapela kantri tu i resis tru long salim kopi bilong ol long ol kantri i save baim kopi. Na sapos kopi bilong yumi i nogut na i no winim laik bilong ol pipel bilong baim, bai yumi i inap long lus olgeta long kopi bisnis bilong yumi. Nogat man bai i baim PNG kopi na bisnis kopi long dispela kantri bai i pundaun olgeta.

Olsem na sapos yumi laik strongim bisnis kopi long PNG, kamapim gutpela nem bilong en na mekim narapela pipel i baim kopi bilong yumi, orait, yumi i mas wok hat nau long mekim kamapim gutpela kopi tru.

Yumi mas bihainim tru ol gutpela pasin bilong planim, pikim na redim kopi bilong salim i go long ol narapela kantri. Na wok bilong mekim kamapim gutpela kopi i save stap wantaim man i planim kopi.



SAMPELA GUTPELA PASIN O ROT BILONG BIHAINIM:

1) Yu mas pikim kopi long han bilong diwai kopi long taim ol kopi i retpela na i redi tru.

2) Yu mas rausim skin bilong kopi long dispela de yu pikim.

3) Bihain long dispela, yu mas lusim i stap inap tupela de samting pastaim, orait, bihain yu mas wasim olgeta kopi gut tru long wara na rausim ol skin i save pas tru long piki-nini kopi. Nau, bikipela samting tru yu mas mekim gut tru long en, em long draim kopi. Sapos yu i no draim kopi gut, sori tru, yu bin wok hat nating tasol long wanem kopi bilong yu bai kamap olsem rabis. Tasol sapos kopi i drai gut tru, bai painim isi long salim na kisim gutpela mani tu.

Taim yu putim sampela kopi i no drai gut tru i go long bek, olgeta kopi i go bagarap olgeta. Em i sting na i smel nogut tru. Na dispela smel i no save lusim kopi. Ol narapela kantri save baim kopi bilong yumi gut.



MOA TAMBU LONG DRING

Long 2 Oktoba insait long Palamen, Mista Denis Young bilong Milne Be i bin mosen long putim moa tambu long bia na 42 memba i bin vot orait; na 14 tasol egens long dispela aidia.

Aidia em hia: em i laik bai gavman i wokim wanpela lo bilong pasim ol ples bilong baim bia long de bilong fotnait. Olsem tasol, em i ting, ol mani bilong ol kwiktait long bia, na i gat liklik hap tasol i go long helpim meri na famili bilong ol.

Em i laik bai gavman i traime dispela pasin inap long wan yia.

YU KEN TOKAUT NAU

Mista John Nilkare, hetman bilong Komisnin i bosim ol laisens bilong salim bia na wiski, i


tok, ol pipel i mas save ol i gat rait long tokaut egens long wan wan stua o man i laik holim laisens bilong salim bia na wiski samting.

Sapos planti pipel i no laik na i ken soim wanpela stua o hotel i brukim lo bilong komisnin bai komisnin inap long tekewe laisens bilong man o stua o hotel.

Tasol planti manmeritumas i kamap bihaintaim tumas, na olsem tokaut bilong ol i sutim graun nating.

Mista Nilkare i tok komisnin bilong em laik skulim ol pipel long pawa bilong ol long pasim rot bilong laisens.

Putim gut yau long redio na sapos yu harim komisnin bilong bia laisens i kamap long provins bilong yu bilong mekim kibung bilong ol laisens, orait, yu go na yu tok - sapos em i laik bilong yu.



Mista Momei Pangial, memba bilong Mendi i tok ol memba bilong Isten Hailans i mas tok strong long ol pipel bilong ol, ol i mas pinisim pasin bilong stilim ol kago i save kam long ol trak i ran long hap bilong Daulo na Kassam. Ol tu i save bagarapim sampela draiva na trak.

Olsem na planti draiva i no laik go long Hailans na olsem prais bilong ol kaikai samting i go antap moa moa yet. Em asua bilong ol dispela stilman tasol bilong Saten Hailans.

Sapos ol i no pinisim dispela pasin, bai gavman i mas salim lain plisman wantaim masket i go poromanim ol trak.

Ol Insurens Kampani i les long baim ol kago i lus pinis; olsem tasol ol prais i go antap moa.

SAUT PASIFIK KOMISIN

Sir Maori Kiki, Forei Minista bilong PNG, bin go long ailan Nauru long Septemba bilong kisisimples bilong mipela olsem independen kantri insait long bikpela sosiesen bilong ol wansolwara em ol i kolim Saut Pasifik Komisnin.

Sir Maori i bung wantaim ol kantri i laik tambuim Frans long pairapim atom bom long solwara bilong mipela.

Em i tok tu, em i ting i gutpela ol braunpela pipel tasol i stap insait long Saut Pasifik Komisnin na ol bikpela kantri olsem Nu Silan na Australia i no ken insait. Taim bilong bosim mipela, em pinis nau.

PNG i givim K20,000 olsem takis bilong en insait long Komisnin.

PIK KARIM MAN

(i kam long pes 5)

ap long Enga Distrik.

Mipela i gat wanpel bikpela tok ples Eng i winim arapela tok ple long PNG. Planti pipe tru. Mining bilong Tanjen i olsem blut bilon pik i mekim kamap mas long Enga Distrik.

Alphonse Paliru
Wapenamanda



EM HIA WANPELA NUPELA TESTAMEN LONG TOK INGLIS, EM OLGETA MAN I WINIM STANDET 6 INAP LONG RITIM.. Em i kostim 75t. tasol.



WEWAK CHRISTIAN BOOKSHOP
Box 169, Wewak
MT. HAGEN CHRISTIAN BOOKSHOP
Box 78, Mt. Hagen

BAIM WANTOK

Sapos yu wanpela yu laik kisisimples WANTOK i kam long yu stret, orait yu salim dispela tiket i kam:

Mi laik kisisimples WANTOK niuspepa inap wan yia olgeta. Nau mi salim K5 (\$5.00) i kam;

Nem:

Adres:

Salim i kam long:

WANTOK - P.O. BOX 396 - WEWAK

INAT BATA FAKTORI

Long Kaiapit klostu long Lae ol fama i bin statim wanpela faktori bilong wokimpinat bata. Long dispela hap ol i gat planti gaden pinat kasang.

Ol man i bin askim Developmen Beng long linau bilong helpim go het bilong dispela wok. Inap nau wanpela koprativ sosaiti i bin helpim ol long K2,000.

12 MOA SIP

Long dispela yia gavman i bin makim Kl.5 milien kina bilong baim kain kain bot bilong helpim ol pipel i stap long ol ailan na ol ino inap i go i kam long balus. Bai 12-pela sip i kamap, stat long mun Disemba.

Gavman tui laik mekim go het moa skul bilong ol kepten na sela long Madang.


PROVINSAL GAVMAN

I tru, Konstitusen i no bin orait yet long pasin bilong provinsal gavman, tasol Michael Somare i laik go het na ilektim ol memba bilong Provinsal Gavman long Bougainville. Em i bilong helpim long stretim pasin kros long dispela ailan.

Bihain oli ilektim ol memba, gavman i laik skruim tok i go bilong mekim pasin bel isi i ken kam bek long Bougainville.

Wanpela memba bilong palamen bilong ol, em Mista Raphael Bele, i bin lusim ples bilong em insait long Palamen. Tasol narapela memba, em Pater Momis, i insait yet; tasol bihain long independens em i no bin kamap long wanpela miting. Sapos em i lusim tripela miting, bai em i aut.

I STRONG, ISI LONG YUSIM NA I KOS LIKLIK



Hardiflex em i olgeta dispela samting, na i luk gut tu. Long wanem Hardiflex faibro i bikpela tru na i karamapim planti spes kwiktaim. Ol smatpela kamda i yusim Hardiflex. Yu tu yu mas smat na yusim.

Tilux em i gutpela samting bilong rum waswas. I strong na isi long joinim. Yu no gat wari long klinim. Na i gat planti kala na stail bilong en. Olgeta ol i luk gut tru, na i nais tru long bilasim haus.

Versilux em i samting tru bilong ol banis insait long haus. Em i strong na isi long yusim. I no ken paia o sting o krun-gut; i bilong stap longtaim tru. Sapos wara i wasim, maski bai em i drai gen kwiktaim na i nupela gen. Olsem tasol Versilux i faibro tru bilong olgeta hap bilong haus: rum malolo, rum waswas, haus kuk, na toilet tu.

Ol dispela kain faibro yu ken baim long: BURNS PHILP na BOWMANS

 **Hardie's**
BUILDING PRODUCTS

Wokim plaua long kaukau na taro



Long yia i go pinis wampela lain bilong yunivesiti i bin go wok long Saten Hailans long hap bilong Kuare klostu long Kagua na ol i trait painimaut sampela pasin bilong kisim olkain samting bilong gaden na wokim nupela kain kaikai long en. Wampela samting ol i bin traime na i wok gut em hia: ol i bin kisim kaukau na bin tanim i go long plaua bilong wokim bisket na bret.



Hia nau mipela i laik bihainim skul bilong ol long pasin bilong mekim dispela wok. Ol poto tu i soim.

(1) Kisim nupela kaukau, nau tasol yu bin kamautim pinis long gaden.

(2) Wasim kaukau, tasol yu no ken rausim skin.

(3) Nau katim kaukau long ol liklik hap, olsem yu save mekim sapos yu laik boilim long wara.

(4) Putim ol hap kaukau long san, antap long wampela mat o plastik o hap laplap.

(5) San na win i mas mekim drai inap tripela de samting. Long nait na taim bilong ren yu mas kisim ol hap kaukau i kam insait long haus.

(6) Bihain ol hap kaukau i strong tru, yu mas kisim wampela liklik masin bilong wilwilim o brukbrukim olkain mit na kaikai samting -olsem yu lukim long poto. Nau yu wilwilim kaukau na em bai kamap olsem plaua.




Dispela plaua nau i gutpela tru long tanim wantaim plaua tru na wokim bret. Kaukau plaua yet em i gutpela long wokim pankek o bisket. Yu ken kapsaitim tu insait long sup, o wantaim grevi taim yu kukim mit.

Yu ken tanim tu wantaim karuka na pinat na kasing na kokonas na planti arapela kain kaikai.

Dispela pasin i no bilong kaukau tasol. I bilong taro tu na yam na mami na tapiok. Yu traime.

Long liklik plet hia yu ken lukim plaua i bin kamap long kaukau. Klostu yu ken lukim plet kasing o pinat na narapela pulap long karuka.



Mani bilong ol rot

Minista bilong Transpot, Mista Iambakey Okuk, bin telimaut tingting bilong dipatmen bilong bilong wok rot long dispela yia. Hia yu ken ikim nem bilong rot na hamas mani bai lus long:

- Petoi - Vaiforlala: K240,000
- Kerema - Murua: K200,000
- Lae - Bulolo: K400,000
- Bakoiudu - Tapini: K300,000
- Oro Bay - Pongani: K250,000
- Goroka - Mount Hagen: K1,000,000
- Madang - Bogia: K200,000
- Wewak - Angoram: K250,000
- Wewak - Aitape: K350,000
- Dreikikir - Lumi: K300,000
- Kundiawa - Keglsugl: K240,000
- Kimil - Tabibuga: K400,000
- Togoba - Wapenamanda: K750,000
- Wabag - Laiagam: K250,000
- Poroma - Tari: K250,000
- Kiunga - Ningerum: K210,000
- Kundiawa - Gumine: K200,000
- Lundret - Mundrau: K150,000
- Sag Sag - Gloucester: K168,000
- Talasea - Kimbe: K200,000
- Pomio - Warangoi: K50,000
- Kavieng - Namatanai: K110,000
- Namatanai - Samo: K100,000
- Lalambut - Bo: K200,000
- Nungwaia - Bongos: K145,000
- Nuku - Mai: K200,000
- Isten Hailans - Faiyantina: K100,000

SINGER

*A Trademark of The Singer Company



PREN BILONG YU INAP OLTAIM



Kamap strong wantaim

VEJEMAIT

Sapos yu laikim ol pikinini i kamap strong, yu mas' givim gutpela kaikai long ol. VEJEMAIT em i dispela gutpela kaikai. Long wanem ol i save wokim long gutpela samting i stap insait long ol kiau. Em i gat planti Vaitamin "B", nambawan kaikai bilong strongim bun na mekim skin i klinpela moa.

Yu ken putim VEJEMAIT long bret o bisket; yu ken tanim wantaim sup o rais o arapela kaikai.

Sapos yu laik dringim gutpela samting, yu ken tanim VEJEMAIT wantaim hatpela wara o susu.


Yu ken baim VEJEMAIT long ol kain kain liklik botol (inap 2 oz, 4 oz, 17 oz) na tu long glas i gat 6 oz. Dispela gen yu ken yusim bilong dringim wara.




i min nambawan kaikai

4232

≡ KING FEATURES SYNDICATE ≡





hia miting bilong Studen Representativ Kaunsil long Port Moresby Tisa les long Septemba. I gat 18 deliget i kam long 10 tisa koles. Miss Rose kedo i bosim miting. Ol i redim rot bilong tis long independen PNG.

Baim graun

Minista bilong Graun, Mista Tomas Kavali, i tok gavman i laik helpim ol man i sot long graun na baim bek ol plantesis long sampela hap.

Tasol ol pipel tu i mas bungim mani na soim gavman ol bai mekim hap wok bilong ol tu.

Mista Kavali i tok bai gavman i baim tupela plantesis long Sentral Provins, tupela long Norten Provins, tupela long Westen Provins, na fai-pela long Milne Be Provins.



Gavman baim sampela graun olsem long ol arapela provins tu, we ol pipel i sot.

Ol skaut wailes long ol kantri

Long poto long raithan ken lukim ol sampela aut na Gaid i sambai ktok wantaim ol skaut ng narapela kantri.

Dispela ol i kolim mbori long wailes. Ol m ol i save skrapim k wantaim ol skaut i ap long olgetahap bing dispela graun.

Ol i mekim long 18 na Oktoba long Port Moresby. Ol skaut i kam ng Lae, Goroka, Madang, ugainville, na Vanimo. esin bilong ol: P29WB.



AFFILIATED WITH LIFELINE INTERNATIONAL

LIFELINE PORT MORESBY

HELP IS AS CLOSE AS A TELEPHONE

Lifeline Port Moresby offers a confidential telephone counselling service -

Family or personal problems:	Anxiety	Pregnancy	Marital
	Stress	Personal relationships	Suicidal
	Alcohol	Social isolation	Legal

SHARE YOUR PROBLEM WITH A TRAINED TELEPHONE COUNSELLOR

Phone: 25.7711 - Daily between 4 p.m. and midnight
Also 10:30 to 1:30 p.m., Monday - Friday

Home phone of Rev. Haste: 25.5632



* Kirap long lephan i go long raithan em Misis Geraldine Briggs na Mis Margaret Briggs, tupela i bilong Volenteri Aboriĵinal Grup long Victoria. Tupela arapela meri i sanap klostu long ol em Mis Elizabeth Reid na Mis Elizabeth Arisa.

Mis Arisa em i meri i makim Papua Niugini long bikpela kibung bilong ol meri long biksiti ol i kolim Kanbera, long Australia. Moa long 700 meri bilong Australia i bin i stap insait long dispela kibung bilong ol meri. Long kibung ya ol i toktok long politik na ol arapela, samting tu.

PNG LONG AUSTRALIA

* Long poto hia yumi lukim Mis Theresa Eri bilong Port Moresby, i wok long soim Misis Marie Szucki na pikinini meri bilong em Tanyia long wanpela buk i soim kopi bilong PNG stret.

Tripela i sanap insait long Niugini At Stua long Sydney So. Long dispela so ol studen bilong Filipin; Tailan; Vietnam; Laos; Burma; Indonesia; Maleiya; Fiji na Papua Niugini i bin soim olkain danis, pilai, kaving na samting olsem. Inap long 3-pela olgeta ol i bin mekim ol kain kain pilai.



* Poto i soim Mis Arisa i sanap toktok wanta: Mis Hay Hobbs na Mista Robert Moore bilong ABC.



* Em PNG Hai Komisina, Mista Oala Rarua na Mis Hayden long Kanbera long Independens De.



* Mis Gwara na Mis Obi, tripela meri i bosim la: breri i toktok wantaim Mista Jeff Scrivener.



Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.